



Број/Број: 03/1-50-14-7-15/12
Сарајево/Сарајево, 6. 6. 2012. godine

PREDMET: Informacija o posjeti Parlamentu i Ministarstvu odbrane Republike Austrije i Generalnom Sekretarijatu OSCE Beč, Austrija

Članovi Zajedničke komisije za odbranu i sigurnost BiH (ZK): Dušanka Majkić - predsjedavajuća, Borjana Krišto-prva zamjenica predsjedavajuće, Nermina Zaimović-Uzunović-članica ZK i Željko Grubešić – stručni savjetnik posjetili su 20. i 21. marta 2012. godine Parlament i Ministarstvo odbrane Republike Austrije i Generalni Sekretarijat OSCE u Beču, Austrija .

Posjeta je realizovana uz podršku Misije OSCE u BiH. Dušan Zoller, Sanja Čatibović i Anela Karić iz Odjela za sigurnosnu saradnju Misije OEBS boravili su sa članovima ZK u Beču.

20. mart 2012. godine

Članovi ZK imali su susret sa članovima Komisije za odbranu i sigurnost Parlamenta Republike Austrije gdje su razgovarali sa Mariom Kunasekom-zamjenikom i Rainerom Vidmanom članom Komisije.

Tokom susreta razmijenjena su mišljenja o brojnim pitanjima iz nadležnosti rada komisija.

Posebno je razgovarano o problemima budžeta za odbranu, iskustvima u parlamentarnom nadzoru kao i aktivnostima u izradi sigurnosne politike. Tokom susreta posebno je izraženo zadovoljstvo bilateralnom saradnjom kao i aktivnošću Oružanih snaga Republike Austrije u Misiji EU ALTEA gdje je njihov doprinos ocijenjen izuzetno visokom ocjenom.

Delegacija Zajedničke komisije je posjetila i Ministarstvo odbrane Republike Austrije. Tom prilikom je razgovarano o brojnim pitanjima.

Domaćini su predstavili sadašnji stepen razvoja Oružanih snaga Austrije, proces izrade doktrinarnih dokumenata i učešća civilnog društva u tom procesu.

Razgovarano je i o stanju personala, strukturi Oružanih snaga i rješavanju problema viškova naoružanja i vojne opreme.

General Peter Resch, brigadir Josef Wimmer, pukovnik Erich Simburger i Dr. Rudolf Logothetti pomoćnik ministra, Alex-Bernd Jandeseck, desk oficir za JI Evropu su u svojim

prezentacijama govorili o aktivnostima oko promjene doktrine sigurnosti R Austrije, promjeni vojne strategije, raspravi o promjeni i dogradnji sigurnosne politike.

Posebno su istakli aktivnosti Vlade Austrije i uključivanju civilnog društva u izradu novih doktrinarnih dokumenata R Austrije.

Budžet za odbranu R Austrije će u periodu od 2013.-2016. godine biti manji za 600 miliona eura i ta činjenica obavezuje i MO i Generalštab OS R Austrije da se ozbiljno razgovara o perspektivi razvoja OS Austrije. Time žele identifikovati svoje odbrambene sposobnosti jer angažovani su u puno vojnih i mirovnih misija i sa sadašnjim potencijalom teško odgovaraju svim dobivenim zahtjevima.

O sigurnosnoj strategiji se raspravlja po fazama i nude se varijante koje treba da racionaliziraju upotrebu postojećih kapaciteta. To zahtjeva pripremu nove strukture, definisanje novih izazova u kojoj do izražaja treba doći realna politika.

O nastavku profesionalizacije OS R Austrije raspravlja se i u Parlamentu i u Vladi R Austrije. Prijedlog odluke traži stavku priuštivosti i o tome su velike polemike gdje civilno društvo ima posebno mjesto.

Poseban blok prezentacija su predstavnici MO R Austrije pripremili o prodaji i uvozu naoružanja i vojne opreme, o legislativi koja prati taj cijeli proces te kontroli i transparentnosti procesa gdje je ustrojen jedinstven logistički sistem.

Predstavnici MO R Austrije nude pomoć MO i OS Bosne i Hercegovine. Tu nema nikakve rezerve i spremni su dodatno učiniti sve što im pružaju sadašnje mogućnosti da obuče naše stručnjake i da to što nauče vrlo efikasno provedu u praksu. Dodatna pogodnost je što su predstavnici OS R Austrije najbrojniji kontigent EU Misije Althea.

Članove Zajedničke komisije je tokom posjete Ministarstvu odbrane Republike Austrije primio i general major Bernard Bair, bivši komandant EUFOR-a u Bosni i Hercegovini. U veoma srdačnom razgovoru razmijenjena su mišljenja o brojnim pitanjima.

Sastancima u Parlamentu i Ministarstvu odbrane Republike Austrije prisustvovao je Neven Kulenović, predstavnik Ambasade BiH u Austriji.

21. mart 2012. godine

Članovi Zajedničke komisije za odbranu i sigurnost posjetili su Generalni Sekretarijat OSCE Beč.

Članovima ZK je dobrodošlicu uputio Nuno Luzio, desk oficir za JI Evropu.

Penny Satches Brohs, starija savjetnica za pitanja prekogranične saradnje je govorila operativnim aktivnostima, bilateralnoj i multilateralnoj saradnji u oblasti kojom se bavi. Posebno se osvrnula na problem ilegalnih migracija, obaveze graničnih komisija, procesa osmišljavanja antikoruptivnih kampanja, zajedničkih obuka u upravljanju granicom

Članovi delegacije su posjetili Operativni centar i Centar za prevenciju konflikta Glavnog sekretarijata OSCE gdje su informisani o aktivnostima centra te su bili u mogućnosti da razgovaraju o relevantnim pitanjima vezanim za Bosnu i Hercegovinu i region u cjelini. Šef Centra Peter Winzenreid je upoznao članove ZK o zadacima i misiji Centra, sistemu ranog upozoravanja, podršci u rješavanju problema u kriznim područjima. Težište u radu Centra su praćenje političke i ekonomske situacije i stanja ljudskih prava u zemljama i regijama gdje se ocijeni da je moguće krizno žarište.

Reinhard Uhrig, Program Ko-ordinator, Odjel za protivterorističke aktivnosti je prezentirao aktivnosti Odjela. Posebno je prezentirao stanje po pitanjima radikalizacije terorističkih aktivnosti i izgradnji kapaciteta za borbu protiv terorizma. Prevencija po pitanju sigurnosti građana u saobraćaju, prenos energije, bezbjednosti komunikacija, tzv. "Cyber security", transfer finansijskih sredstava, ekstremizmi su teme o kojima se posebno razgovaralo. Tokom razgovora sa članovima ZK su razmijenjena mišljenja o brojnim pitanjima te mogućnosti organizovanja regionalnih skupova i konferencija na kojima bi se o svim ovim pitanjima konkretnije razgovaralo.

Mathew Geertsens, Forum za sigurnosnu saradnju, Sekcija podrške govorio je o pitanjima ispunjavanja političko-vojnih obaveza svake zemlje članice OSCE. Posebno je bilo razgovora o ispunjavanju vojno-političkih obaveza BiH prema OSCE Kodeksu ponašanja. Dokument o o konvencionalnom naoružanju i municiji, redukciji zaliha zastarjele municije i izgradnja sigurnosnih kapaciteta skladištenja su bila posebna tema razgovora. Razgovaralo se i o izgradnji novog koncepta mjera za jačanje međusobnog povjerenja.

Tokom razgovora u sjedištu OSCE Glavnog Sekretarijata članovi ZK su razgovarali sa službenicima OSCE o temama koje su prezentirane. Razmijenjena su mišljenja, ukazano im je na problematiku i gdje se od njih očekuje veće angažovanje te im je sugerisano da je jako bitno da organizuju regionalne skupove na kojima bi se daleko više i sa konkretnijim podacima i činjenicama razgovaralo o tematici koju obuhvata OSCE Kodeks ponašanja u ispunjavanju vojno-političkih obaveza.

Članovi ZK su posjetili Ambasadu Bosne i Hercegovine u Republici Austriji gdje su sa osobljem Ambasade i Stalne Misije BiH pri UN i OSCE razgovarali o njihovom radu i aktivnostima.

Razgovaralo se i o aktivnostima službenika Ambasade i Stalne Misije koje su tokom susreta predstavljali Tanja Milašinović-Martinović, ambasadorica, Momo Ševarika, šef Konzularnog odjela, Neven Kulenović, Darko Vidović iz Stalne Misije BiH pri UN i OSCE i brigadir Mihajlo Vujović- vojni ataše BiH u R Austriji.

PREDSJEDAVAJUĆA
ZAJEDNIČKE KOMISIJE
Dužanka Majkić

Dostavljeno:

- naslovu
- a/a